

KAOMININA FIOMBONANA ATSIMONDRANO

Manao kiantranoantrano ny komity loharano ka mampitaraina ny mponina

Efa hatrany am-boalohany amin'ny fizarana fanampiana amin'ny mponina no tsikaritra, fa manao kiantranoantrano ireo olona n-ditra ao anatin'ny mpikambana Komity Loharano eny amin'ny Kaominina Fiombonana ao anatin'ny distrikan'Antananarivo atsimondrano. Misy mihitsy aza ny fanavakavahana tokantrano ao anatin'ity kaomina ity ataon'ireo mpanao fanadihadiana avy amin'ity komity ity, ka mampitaraina ny mponina. Izy ireo no nanivana ireo tokantrano tokony hisitraka ny fanampiana, na avy amin'ny FID, na avy amin'ny fitondrana. Ireo kinamanamany sy mifan-drainy amin'izy ireo ihany

na ihany koa ny mifan-drainy loko pôlitika aminy araka izany no misitraka hatrany ny fanampiana. Hita ho mandehandeha mitety ny kaomina izy ireo taorian'ny filazana, fa mahazo avokoa izay manana karnem-pokontany, kanefa misy ireo tokantrano dinganina avy hatrany tsy nasiany fanadihadiana na kely aza. Mazava loatra, fa ny lisitra eny am-pelatanan'ireo komity loharano dia efa vita soratra mialoha tany ambadika tany. Tsy nisy araka izany ny fanadihadiana vaovao nataon'izy ireo, fa mba hisehoana ivelany fotsiny ho nanao ny asany ity komity loharano ao amin'ity kaomina ity. Ny tena mampalahelo

ireo tokantrano navakavahana tsy nasiana maso na kely akory aza ary tsy norahirahiana mihitsy, dia misy amin'ireo mpikambana ao anatin'ny komity no mahazo hatrany, izay fanampiana avy amin'ny fitondrana nozaraina ho an'ny vahoaka. Rehefa dinihina anefa dia tsy ao anatin'ireo olona marefo izy ireo, fa fitadiavana tombontsoa fotsiny no n-dirana ao anatin'ny komity. Araka izany dia lasa kiantranoantrano ny zavamisy amin'ny fanampiana avy amin'ny fitondrampanjakana ao amin'ny kaomina Fiombonana ao anatin'izao hamehana ara-pahasalamana izao. Tsy mitsahatra ny fanara-raotana ataon'ireo mpi-


kambana ao amin'ny komity, ary tsy misy mihitsy ny fiezahana hitsinjo ireo tokantrano sahirana hafa, sy hanatona azy ireo. Vao tamin'ny herinandro iny izao, dia re fa amin'ny alina no hizaran'izy ireo ticket amin'ny fanampiana. Izany hoe, tsy amin'ny fahamarinana ny fomba fiasan'ity komity loharano eny an-toerana ity. Tsy hampisy firaisan-kina ireo mponina eny an-toerana ny vokatr'izany. Ny tsikaritra dia tsy misy mihitsy ny fanaraha-maso ny fomba fiasany sy ny vokatry izany asany izany, fa manaram-po toy ny "banga mihomehy alina" izy ireo amin'izao ataony izao.

Radafy

Fiainana andavanandro

Mbola ho ela vao hiarina ny fahefa-mividin'ny vahoaka

Miha-sokafana miandala ireo fepetra namatorana ny fiarahamonina niatrehana ny valanaretina covid-19. Tsy hisy hitehaka izany aloha satria ny fitondrana ihany no nahatonga izao olana mafy atrehim-bahoaka izao, aaka tsy ho hadinoina. Olana mafy iray lehibe iainam-bahoaka tato anatin'ny enim-bolana latsaka ny nitontonganan'ny fahefa-mividy, noho ny fahapotehan'ny fivelomany sy ny fihariany. Anisan'ny ambientin-tenin'ireo mpivarotra ny tsy fisian'ny mpanjifa na ny tsy fananany vola. Tsy niamora rahateo ny vidin'entana maro samihafa fa vao mainka niaka-bidy tato anatin'izao hamehana ara-pahasalamana izao. Tsy miara-dàlana amin'izay anefa ny fahefa-mividy ny mponina. Niha-nitontongana ihany koa ny sandan'ny vola ariary. Vo-



katr'izay, mihena ny sandan'ny entana jifaina eny an-tsena. Fotoana tena hividiana-ireo ray aman-dreny manan-janaka hianatra fitaovam-pianarana izao. Miferin'aina anefa izy ireo noho ny vola kely eo am-pelatanana izay zara raha misy sandany. Ny kitapom-bolan'ny isan-tokantrano rahateo nokaohin'ny krizy ara-pahasalamana nandritry ny volana maro. Ny sekoly ianaran-janaka tsy te-hahalala, fa ny fan-

doavana saram-pianarana nandritry ny volana tsy nianarana ihany ny azy, miampy ny saram-pisoratana anarana vaovao ary ny fitakiana ireo koja-koja sy fitaovam-pianarana tsy maintsy ilaina. Izany hoe, ireo ray aman-dreny dia rotehin'ny olana maro loha amin'izao fotoana izao. Rehefa jerena anefa ny fivoaran'ny raharaham-pirenena, dia mbola ho ela vao hiarina ny fahefa-mividy ny vahoaka eto amin'

ity firenena ity. Iaraha-mahita tsara ny fomba fiasan'ny fitondrana ho amin'ny fanarenana ny toekarena. Mandringa ny lafiny sasany izay vao mainka potehiny sy hitsakitsahany aza kanefa tena mahakasika mihitsy ny any amin'ny kitapom-bolan'ny isan'ny tokantrano Malagasy. Ireo tokantrano voatohintohina ireny araka izany dia ho very tanteraka ao anatin'izao vanim-potoana izao. Io fomba fiasan'ny fitondrana io, dia ahafahana mamaritra mazava fa mbola ho ela vao hiarina ny fahefa-mividin'ny vahoaka. Izany hoe, mbola ho ela vao hahita mangirana amin'ny fihatsaram-piainana ny vahoaka Malagasy, fa aza manaiky hampafinofinina amin'ny kabary tsara lahatra isan-karazany rehe-tra izao.

Sôh'son

Ampahana vahoaka Malagasy

Tsy rahirahin-dRajoelina sy ny fitondrany izay hahafaty azy

Lainga sy fihatsarambelatsihy ny filazan-dRajoelina sy ny fitondrana, fa mahatsapa ny fahoriam-bahoaka sy ny fahantrany. Miharihary, fa tsy vahoaka manontolo no ambarany amin'izany, satria misy ampahana vahoaka eto amin'ity firenena ity, tena odian-tsy hita ny fahavoazany ary tsy misy ny fiezahana hiraharaha azy ireo. Nanomboka hatrany amin'ny fiantombohan'ny fotoana fidirana amin'ny hamehana ara-pahasalamana izany. Tena misy ny natao zanak'ikalalahafa ary tsy namakiana loha izay fahavoazany any. Iaraha-mahita izany amin'ireo mponina eny anivon'ny fokontany na kaomina maro samihafa mitaraina, fa tsy mba misitraka ny fizarana hatramin'izay, ary mbola tsy hahazo amin'izao fotoana izao. Saika isan'andro no andre-nasana izany amin'ny haino aman-jery, ary hita izy ireo fa tsy mba misy hitarainana sy hisarantonga akory. Tsy re mihitsy anefa izay fihetsika na fepetra noraisin'ny teo anivon'ny FID na ny fitondrana momba izany. Izany hoe, ireo sokajin'olona tsy misitraka ny fanampiana ireo, esorina ireo mpiasam-panjakana na ma-

nana ny ampy tsy ao anatiny, fa izy ireo dia tena sahirana ara-pivelomana mafy tokoa amin'izao fotoana izao, dia adino tanteraka, tsy misy miraharaha. Ao anatin'izany ny governora, ny lehiben'ny distrika, ny Depiote, ny Ben'ny tanàna, ny Sefo fokontany, miaraka amin'ny sefo sektera any amin'ny fokontany, dia tsy miavaky loha amin'ireo olona na tokantrano sy fianakaviana ireo. Izany hoe, izy rehetra ireo dia miray petsapetsa tsy mandraharaha na miasa saina ireo olona ireo. Raha aravona izany, izao fitondrana ankehitriny izao, dia fitondrana tsy mahavita miandraikitra ny fitsinjovana tanteraka ireo vahoaka ao aminy. Misy avelany ho sahirana sy afoiny ho faty eo, ary misy tam-penany maso amin'ny fanampiana eo am-pelatanany tsy hahavita am-bolana akory fa tsy aman-taonany. Raha mbola fitondrana tsy mahavita misahana ny fitsinjovana sy ny fiveloman'ny mponina ao aminy, dia fitondrana tsy mahafaty ny fitantanam-pirenena sy ny fahaiza-mitondra firenena izany.

Sôh'son

Fanarenana ny lalana Antananarivo

Nolavadavahana efa ho 10 andro mahery, mbola tsy vita ihany

Anisan'ny renivohitra ratsy lalana indrindra maneran-tany Antananarivo renivohitra, raha mijery ny zavamisy. Saika ireo lalambe rehetra ifamoivoizana dia tsy maintsy misy fahasimbany na potika avokoa. Feno lavadavaka sy mikitaontaona sady ratsy ny ankamaroany. Tena misy hataràna tanteraka amin'ny fivoarana ny renivohitr'i Gasikara. Ny mahavariana, raha niseh-nanao be fiavy nanamboatra ny lalana simba ny tomponandraikitra ny fiadidiana ny tanànan'Antananarivo renivohitra sy ny teo anivon'ny minisiteran'ny asa vaventy raha vao nanomboka ny fihibohana tamin'ny hamehana ara-pahasalamana tany amin'ny telo volana voalohany, tato anatin'izao fiverenana tamin'ny fihibohana izao, dia tsy nisy intsony izany. Tsy re intsony izy ireo amin'izay finjavana hanarina ny lalana izay. Mijaly araka izany ireo mpampiasa lalana amin'izao fotoana izao, ary tsy atao hahagaga ny fisian'ny fitohanana andanian'ora maro etsy sy eroa. Io fahapotehan'ny lalana io no anisan'ny antony iray lehibe amin'ny fitohanana eto an-drenivohitra sy ny manodidina. Nankaiza ny tomponandraikitra, fa tsy misy ny tamberim-bidy na tamberin'andraikitra amin'ny hetra terena aloan'ny mponina? Variana amin'ny zavatra hafa izay tsy laharan-pahamehana amin'ny mponina izy ireo. Voalohany amin'izany ny resaka politika maloto amin'ny fanen-jehana ireo mpifanandrana ara-politika izay atahorana mafy. Izany no andaniana ron-doha, fa tsy izay fitadiavana fomba haingana hanasoa ny vahoaka. Ny fahasimban'ny fitaovana ampisaina toy ny fiarakodia dia misy fiantraikany ratsy, tsy eo amin'ny tompona fiarakodia ihany, fa amin'ny mponina ihany koa. Misy fiantraikany amin'ny fiharian'izy ireo izany na amin-javatra maro samihafa iainan'ny vahoaka. Azo inoana fa tsy hahatakatra izay ireo tomponandraikitra isan-tsokajiny eo amin'ny fitondrana matoa atao toy izao ny fanomezan-danja amin'ny fanamboaran-dàlana. Misy ireo lalana nolavadavahana efa ho 10 andro mahery izao mbola tsy vita ihany, nefa miteraka fitohanana lavareny noho izay faharatsian'ny lalana izay. Tamin'ny fihibohana no efa nambara fa anaovana izany, nefa tsy vita, iszao vao mikoropaka ny fiadidiana ny tanàna, sy ny asa vaventy. Tena ela fiasa. Ary ahiana aza mbola anaovana kajikajy politika ny fotoana andrasana hanatanterahana izany. Efa fanaon'ireto olona ireto rahateo izany. Ny vahoaka ihany anefa no mitaty ny voka-drat-sin'izany rehetra izany, fa resabe fotsiny ny amin'ny filazana, fa soa iombonana, na fikatsahana ny tombontsoa ambonin'ny firenena no imason'izy ireo.

Radafy

Taratasin'ny mpamaky

Fanehoan-kevitra ampitaina amin'ny gazety Ny Valosoa Vaovao izao manaraka izao: hiresaka ronono ihany aho fa tsy aritro tsony. Maninona hono no narina ny ronono? Efa surproduction tempoko ny aty Vakinankaratra amin'izao, satria tsisy mandray ilay ronono! Dia niteny nareo hoe maninona raha nozaraina? Ef a tena nizara tempoko ny olona ary efa niantsoantso hoe misy fizarana ronono maimaim-pona, fa mbola tsy lany ihany ilay ronono! Dia hoy ny sasany hoe maninona raha anaovana produit hafa toy ny fromage? Yaourt? Misy possibilité an'zan-ve ry reto tsy efa natao ah! sa sitrapony no hanimba ronono, sitrapony no hanary ilay hany MBA fidirambolany? Dia hoe maninona nefa raha tsy noterena ilay omby e? Dia ho vonoina angah lay omby, tsy Aleo ve manary ronono toy izay mamono omby, mety ho faty mantsy ny ronono raha tsy terena. Ny omby tokoa rehefa tsy terena ny rononony dia lasa marary izy dia maty. Dia hoe maninona raha nomena an'ny Socolait hono satria samy mpamongady ireo? Efa samy manana ny mpamatasy tempoko ireo orinasa roa ireo. Bref: misy sary tian'ny tantsaha aseho koa eo. Efa fanao ny toy izany any an-dafy rehefa tezitra amin'ny mpitondra ny mpiompy sy ny mpamboly. Dia refa tsy takatra dia aza miseho mitsaratsara fahatany, fa tsy takatrao zany lay izy. Lazain'ny MAPAR fa nokaramaina hono ireo: mety izany angamba na fanaon-dry zareo... fa ny ronono tempoko dia simba rehefa mijanona +48h, ka rehefa tsisy mpandray dia zao ny zava-misy. NB: ronono efa simba ireo fa tsy mety anaovana yaourt/fromage, na zaraina intsony.

**Fitiavana Rakotoson
Ambano, Antsirabe II**